

中國方志叢書・華北地方・第三二四號

甘肅省

狄道州志

(二)

成文出版社有限公司印行

中國方志叢書·華北地方·第三二四號

據

清·呼延華國纂修
清·乾隆二十八年修官報書局排印本

影印

甘肅省

狄道州志

(二)

成文出版社有限公司印行

狄道州志卷之八

人物上

名臣

辛武賢

辛慶忌

李寶

辛子馥

弟子華
子德維

辛慶之

辛術

辛

昂

辛公義

李禮成

辛

秘

漢

辛武賢宣帝神爵初爲酒泉太守時先零羌楊玉等反趙充國至金城願罷騎兵留屯田欲俟虜疲劇乃擊之武賢奏言郡兵皆屯備南山北邊空虛勢不可久可益馬食以七月上旬分兵並出張掖酒泉合擊枹罕在鮮水上者天子下其書拜

人物上

破羌將軍

見趙充國傳

按班固贊曰狄道辛武賢慶忌皆以勇武顯聞

辛慶忌字子真武賢子少以父任爲右校永隨長羅侯常惠屯田烏孫赤谷城與歙侯戰陷陳卻敵惠奏其功拜爲侍郎遷校尉將吏士屯焉耆國還爲謁者元帝初補金城長史舉茂才遷郎中車騎將軍朝廷多重之者轉爲校尉遷張掖太守徙酒泉所在著名成帝初徵爲光祿大夫遷左曹中郎將至執金吾始武賢與趙充國有隙後充國家殺辛氏至慶忌爲執金吾坐于殺趙氏左遷酒泉太守歲餘大將軍王鳳薦慶忌質行正直仁勇得衆心通於兵事明畧威重仕國柱石父

破羌將軍武賢顯名前世有威四夷臣鳳不宜久處慶忌之
右迺復徵爲光祿大夫執金吾數年坐小法左遷雲中太守
復徵爲光祿勳時數有災異丞相司直何武上封事言慶忌
行義修正柔毅敦厚謀慮深遠前在邊郡數破敵獲虜外夷
莫不聞宜在爪牙官以備不虞其後拜爲右將軍諸吏散騎
給事中歲餘徙爲左將軍慶忌居處恭儉食飲被服節約獨
性好輿馬多解明爲國虎臣遭世承平匈奴西域親附敬其
威信年老卒官長子通爲護羌校尉中子遵函谷關都尉少
子茂水衡都尉出爲郡守皆有將帥之風宗族支屬至二千
石者十餘人元始中安漢公王莽秉政見慶忌本大將軍鳳

所成三子皆能欲親厚之是時莽方立威柄用甄豐甄邯以自助茂自見名臣子孫兄弟並列不甚誦事兩甄時平帝幼外家衛氏不得在京師而護羌校尉通長子次兄素與帝從舅衛子伯相善兩人俱游俠賓客甚盛及呂寬事起莽誅衛氏兩甄搆言諸平陰與衛子伯爲心腹於是司直陳崇舉奏其宗親隴西辛興等侵陵百姓莽遂按通父子遵茂兄弟及南郡太守辛伯等皆誅殺之辛氏繇是廢慶忌本狄道人爲將軍徙昌陵昌陵罷留長安

漢書本傳

陳子仁曰何武薦慶忌曰宜在爪牙以備不虞蓋不盡知慶忌者觀班固傳言匈奴西域敬其威信是其大節不在此當

其上書救劉輔叩頭救朱雲此二事表表絕人班固獨不載本傳何也慶忌在漢將中有汲黯社稷之力量何武不知於當時班固不知於後世吾故揭而出之

漢書
評林

北魏

李寶字懷素涼王暕之孫也沉雅有度量驍勇善撫綏伯父歆爲沮渠蒙遜所滅寶徙於姑臧歲餘隨舅廣契北奔伊吾臣於蠕蠕其遺民歸附者稍至二千寶傾身禮接衆皆樂爲用屬世祖遣將討沮渠無諱於敦煌無諱捐城遁走寶自伊吾南歸敦煌遂修繕城府規復先業遣弟懷達奉表歸誠世祖嘉其忠欵拜懷達敦煌太守別遣使授寶使持節侍中鎮西

大將軍沙州牧敦煌公仍鎮敦煌眞君五年因入朝遂留京師拜外都大官轉鎮南將軍并州刺史還除內都大官高宗初改授鎮北將軍太安五年薨年五十三詔賜命服一襲贈以本官諡曰宣有六子承茂輔佐公業冲

魏書本傳

辛子馥字元穎穆長子早有學行累遷平原相父子並爲此郡吏民懷安之元顥入洛子馥不從莊帝反政封三門縣男天平中除大尉府司馬長白山連接三齊瑕邱數州之界多有盜賊子馥受使檢覆因辨山谷要害宜元鎮戍之所又諸州豪右在山鼓鑄姦黨多依之又得密造兵仗上表請破罷諸治朝廷善而從之後卒於清河太守子馥以三傳經同說異

遂總爲一部傳註並出校比短長會亡未就

北史本傳

弟子華字

仲夷天平中右光祿大夫子德維武定末司徒行叅軍

魏書辛紹

先傳

辛慶之字餘慶世爲隴右著姓父顯宗馮翊郡守慶之少以文學徵詣洛陽對策第一除秘書郎屬爾朱氏作亂魏孝莊帝令司空楊津討之津啟慶之爲行臺左丞與參謀議至鄴聞孝莊帝崩遂出交冀間謀結義徒以赴國難尋而節閔帝立乃還洛陽及賀拔岳爲行臺復啟慶之爲行臺吏部郎大統初從周文帝東討爲行臺左丞六年行河東郡事九年入爲丞相府右長史除度支尙書復行郡事遷南荊州刺史加儀

同三司慶之位遇雖隆而率性儉素車馬衣服亦不尚華侈
志量淹和有儒者風度特爲當時所重又以其經明行修令
與盧誕等教授諸王廢帝二年拜秘書監卒官子加陵主寢

士

北史
本傳

北齊

辛術字懷哲俊之弟少明敏有識度解褐司空胃曹參軍再遷
尚書右丞出爲清河太守致有能名遭父憂去職清河父老
數百人詣闕請立碑頌德齊文襄嗣事追詣晉陽爲上客累
遷散騎常侍武定六年侯景叛除東南道行臺尚書封江夏
縣男與高岳等破侯景擒蕭明遷東徐州刺史爲淮南經略

使齊天保元年侯景徵江西租稅術率諸軍渡淮斷之燒其
稻數百萬石還鎮下邳人隨術北渡淮者三千餘家東徐州
刺史郭志殺郡守文宣勅術有犯法者刺史先啟聽報以下
先斷後表聞齊代行臺兼認民事自術始也安州刺史臨清
太守盱眙蘄城二鎮將犯法術皆案之睢州刺史及所
部郡守俱犯大辟朝廷以其奴婢白口及資財盡賜術三辭
不見許術乃送詣所司不復以聞及王僧辯破侯景術招攜
安撫城鎮相繼欵附前後二十一州於是移鎮廣陵獲傳國
璽送鄴文宣以璽告於太廟尋徵爲殿中尚書領太常卿仍
與朝賢議定律令遷吏部尚書術性尚貞明取士以才器循

名責實甚爲當時所稱天保末文宣嘗令術選百員官參選者二三千人術題目士子人無謗譏其所旌擢後亦皆致通顯術清儉寡嗜慾勤於所職臨軍以威嚴牧人有惠政少愛文史晚更勤學雖在戎旅手不釋卷及定淮南凡諸資物一毫無犯唯大收典籍并顧陸之徒名畫二王以下法書及還朝頗以饋遺權要物議以此少之十年卒年六十皇建二年贈開府儀同三司中書監青州刺史子閤卿尙書郎閤卿弟衡卿有識學開府參軍事隋大業初卒於大常丞

北史本傳

北周

辛昂字進君慶之族子數歲便有成人志行有善相者謂其父

仲略曰公家雖世代冠冕然名德富貴莫有及此兒者年十八侯景辟爲行臺郎中景後來附昂遂入朝後追論歸朝勳封襄城縣男及尉遲迥伐蜀昂募從軍蜀平迥表昂爲龍州長史領龍安郡事威惠洽著迥復表昂行成都令昂到縣便與諸生祭文翁學堂因共飲宴謂諸生曰子孝臣忠師嚴友信立身之要如斯而已諸生等並深感悟於是并邑肅然咸從其化遷梓潼郡守六官建人爲司隸上士襲爵繁昌縣公天和初陸騰討信州蠻詔昂便於通渠等州運糧饋乏時臨信楚合等諸州人庶多從逆昂諭以禍福赴者如歸乃令老弱負糧壯夫拒戰莫有怨者使還屬巴州萬榮郡人反叛

圍郡城昂募得三千人倍道兼行出其不意又令其衆皆作中國歌直趨走賊壘賊望風瓦解詔賞昂奴婢二十口繒綵四十疋後爲渠州刺史轉通州推誠布信甚得夷獠歡心秩滿還京進位驃騎大將軍開府儀同三司

北史辛慶之傳

隋

辛公義祖徽魏徐州刺史父季慶青州刺史公義早孤爲母氏所養親授書傳周天和中任太學生以勤苦著稱武帝時召入露門學每月集御前令與大儒講論上數嗟異建德初授宣納中士從平齊累遷掌治上士開皇元年除主客侍郎轉駕部侍郎安輯邊境七年從軍平陳以功除岷州刺史土俗

畏病若一人有疾卽合家避之父子夫妻不相看養病者多死公義患之因分遣官人巡檢部內凡有疾病皆以床輿來安置廳事暑月疫時病人或至數百廳廊悉滿公義親設一榻獨坐其間終日連夕對之理事所得秩俸盡用市藥爲迎醫療之躬勸其飲食於是悉差方召其親戚而諭之諸病家子孫慙謝而去始相慈愛此風遂革後遷牟州刺史下車先至獄中親自驗問決斷咸盡方還大廳受領新訟皆不立文案遣當值佐寮一人側坐訊問事若不盡應須禁者公義卽宿廳事終不還閣曰刺史無德何以導人豈有禁人在獄而心自安乎罪人聞之咸自歎服後有欲爭訟者多兩讓而止

時山東霖雨自陳汝至於滄海皆苦水災境內犬牙獨無所
損仁壽元年追充揚州道黜陟大使豫章王暕恐其部內官
寮犯法預令使屬之公義答曰不敢有私及至揚州皆無所
縱捨暕從之煬帝卽位揚州長史王宏入爲黃門侍郎因言
公義之短竟去官吏人守闕訴冤相繼不絕後數歲帝悟除
內使侍郎丁母憂未幾起爲司隸大夫武賁郎將從征至柳
城郡卒時年六十二子融

隋書
本傳

李禮成字孝諧涼王暕之六世孫祖延實魏司徒父彧侍中禮
成年七歲與姑之子蘭陵太守滎陽鄭顥隨魏武帝入關及
長沉深有行檢不安通賓客魏大統中釋褐著作郎遷太子

洗馬周受禪拜平東將軍散騎常侍於時貴公子皆競習弓馬禮成雖善騎射而從容儒服後以軍功賜爵修陽縣侯拜遷州刺史伐齊之役從帝圍晉陽禮成以兵擊南門齊將席毗羅率精甲數千拒帝禮成力戰擊退之加開府進封冠軍縣公拜北徐州刺史未幾徵爲民部中大夫禮成妻竇氏早沒知高祖有非常之表遂聘高祖妹爲繼室情契甚歡及高祖受禪拜陝州刺史進封絳郡公尋遷右武衛大將軍歲餘出拜襄州總管稱有惠政數載復爲左衛大將軍時突厥屢爲寇患緣邊要害多委重臣由是拜甯州刺史歲餘以疾徵還京師終於家其子世師官至度支侍郎

隋書本傳